



La mesjamna sera ha Giuventetgna Cadi envidau a Sedrun ad ina sera d'informaziun e discussiun. Il tema central eran ils carstgauns e lur orientaziun ed identitad sexuala.

SUSI ROTHMUND/FMR

«Persunas queer – quei ei in tema sensibel ch'ins astga denton buca tabuisar», di la promotura dalla lavur da giuventetgna tier Giuventetgna Cadi, *Gabriela Cabalzar-Lombriser*. Perquei ha ella envidau giuvenils, geniturs, persunas d'instrucziun e tuts interessai ad ina sera d'informaziun e discussiun cun *Holger Niggemann* e siu partenari *Björn Niggemann*. Holger Niggemann ei meinafatschenta dall'uniun «sozialwerk.LGBT+» cun sedia a Cuera. A Cuera e Buchs organischa quell'uniun, ch'ei dat dapi l'entschatta d'uonn, meisas rodundas e sentupadas «coloradas», cussegliaziuns pertuccont temas entuorn LGBTIAQ+ ed auter. «Igl ei l'emprema ovra sociala da quei gener en Svizra. Il Grischun ha pia ina rolla da pionier e sin quei astgein nus esser loschs», aschia Gabriela Cabalzar-Lombriser.

### Allontanau placats

Che l'acceptanza per orientaziuns ed identitads sexualas che corrispundan buc alla norma ei tier certins magari pintga, muossa il fatg ch'ils placats per l'occurrenza – organisada da Giuventetgna Cadi – ein vegni allontanai pliras ga. «Nos placats colorai ein vegni scarpai giu a Sedrun e Mustér, quei dat propi da patertergar e muossa che aunc ditg buca tuts ein prompts d'acceptar ch'ei dat massa orientaziuns ed identitads sexualas», di la promotura dalla lavur da giuventetgna. Gest quella homofobia seigi era quei che fetschi savens greva la veta a quels che seigien orientai auter che la pluralitad. Perquei seigi ei fetg bien ch'ei detti ussa l'uniun «sozialwerk.LGBT+» ed il «treff.

LGBT+» a Cuera. Leu san persunas giuvnas e queeras s'entupar e survegnan era informaziuns e cussegls dallas persunas dil fatg.

### 144 orientaziuns sexualas

Holger Niggemann s'identifichescha sco persuna non-binara e vul semplamein vegnir clamaus «Holger». Sper las persunas non-binaras dat ei aunc ina massa autras identitads sexualas. Cun quella ei la segirtad interna manegiada, che mintgin sez ha per sia «schlatteina». Da l'autra vart datti era la definiziun co auters vesan e giudicheschin ina persuna e l'orientaziun sexuala. Tenor Holger dat ei buca meins che 144 orientaziuns sexualas. Las pli enconuschentas han el e siu partenari explicau la mesjamna als presents. «Vus che essas cheu oz essas probablamein tuts hetero-ally», ha Holger manegiava ed explicau che quei seigi la gruppa da



Holger Niggemann meina l'uniun «sozialwerk.LGBT+» cun sedia a Cuera. A Cuera e Buchs organischa quella meisas rodundas e sentupadas «coloradas» e porscha cussegliaziuns pertuccont temas entuorn LGBTIAQ+ ed auter.

FOTOS SUSI ROTHMUND

carstgauns heterosexuals che sustegnien tut ils auters orientai.

### Ina necessitad

Holger e Björn vivan dapi nov onns en ina relaziun purtada en, la maridaglia lesson ei ussa prender suenter. Culla votaziun dalla dumengia vargada seigi quei ussa lubiu e la Svizra hagi fatg in grond pass en ina buna direcziun. Sco promotur da giuventetgna ad Untervaz ha Holger constatata ch'il basegns per ina pusseivladad da sentupar per giuvens queers ei ina necessitad el Grischun. Ch'ina tala purschida manca ha il pèr denton era viu pliras ga en lur ambient personal. Oravontut giuvenils da 12 entochen 16 onns sappien buca nua sentupar e s'informar. Dus giuvenils che hagian fatg igl outen seigien perfin vegni bess ord casa dils geniturs dacuort. Perquei han Holger e Björn cla-

mau en veta l'uniun «sozialwerk.LGBT+». La lavur sociala da quella vegn actualmeins finanziada entras il sustegn da sponsuras e sponsurs. Ils fundaturs ein actualmeins denton en contact cul cantun e speran sin sustegn. Era Gabriela Cabalzar-Lombriser ha constatata ch'il basegns da s'inscuntrar e saver discuorer ei fetg gronds tier persunas queeras. «Sch'ei fan igl outen vegnan ei savens stuschai ora e piteschan da mobbing. Era a casa survegnan biars negin support ni che lur orientaziun vegn acceptada mo nuidis, e quei sa esser zun pesont», di ella ed aschunta ch'ella hagi era gia fatg quella experienscha. Quels carstgauns giuvens drovien lu in agid e la nova «sozialwerk.LGBT+» uniun seigi pli che beinvegnida.

Ulteriuras informaziuns: [www.sozialwerk.lgbt](http://www.sozialwerk.lgbt) ni era [www.treff.lgbt](http://www.treff.lgbt) u per telefon 076 389 51 00